



Casa da color – viseta dil museum Hundertwasser.



Gada, Ladina e Selina avon il Wiener Rathaus.



Julia, Saskia e Mira von la catedrala da sogn Stiafen.

Il viadi a Vienna

Scola media propedeutica dalla Surselva sin viadi a Vienna

■ **Mintg'onn interpren la Scola media propedeutica ina excursiun, ella quala parts culturalas stattan el center. Quest onn ha il viadi menau nus a Vienna, in marcau ch'ha influenzau l'Europa gia dapi tschentaners. Il viadi da quater dis duei dar allas scolaras ed als scolaras entginas impressiuns e comprensions dil marcau e sia historia.** Per la dimora eis ei vegniu preparau treis differents programs, numnadamein in musical, in artistic ed in ella direcziun dalla scienza naturala.

Da Glion a Vienna

Nies viadi ha entschiet la gievgia endamaun allas 06.20 a Glion. Suenter rondund otg uras viadi cun il tren essan nus arrivai a Vienna. In liung viadi ch'ha strapazzau empau tgierp ed olma. Malgrad tut havein nus giu fetg legher ed havein saviu guder il viadi communabel. Allas 14.30 essan nus lu arrivai saunamein al liug da destin. Igl'empreme havein nus retratg las combras dil hotel ed essan sevevgni empau dil stentus viadi. Suenter havein nus fatg ina schinumna da «Schnitzeljagd», ella quala nus havein giu dad encurir entgins monuments historics. Aschia havein nus saviu emprendre d'enconuscher empau meglier il marcau e ses monuments historics. Cun quei giug ein massa bialas fo-

tografias vegnidas fatgas che vegnan aunc ditg a star a nus en memoria. Suenter quei liung di essan nus i baul a letg per che nus seigien l'auter gi cargai cun massa energia.

Il secund di

Il venderdis endamaun han tuttas scolaras e tuts scolaras visitau la casa sco era il museum da «Hundertwasser». Mei personalmein han ils maletgs impressiunau ed inspirau fetg. Il suentermiezgi ha ei dau duas differentas gruppas. Ina da quellas ha visitau il museum dalla historia naturala nua ch'ins ha saviu contemplar ina massa minerals ed animals stuppai ora. L'autra gruppa ha il medem temps visitau l'opera statale e silsuenter il museum Leopold. La sera havein nus passentau comunablaimein el club da Jazz Porgy & Bess. Per mei ei quei stau in'experientscha tut speciala per quei ch'jeu hael aunc mai visitau in tal club da jazz. Aschia ei in interessant e palpittont di ius da rendiu.

Il tierz di

Il tierz di ein las classas puspei vegnidas spartidas en duas gruppas. Ina ha visitau il «Narrenturm». Ina tuor ch'ei emplenida cun rodund 49'000 preparats ed ei tras quei la pli gronda exposiziun patologica sil mund. Ils preparats

existan d'organs humans reals ch'ei vegni mess en in liquid che senumna «Formaldehyd». Ulteriuramein ei era exponiu ossa da carstgauns e preparats da extremitads humanas ch'ei colurai fetg real. L'autra gruppa ha visitau il museum d'art Albertina. Ils maletgs ch'ei exponi leu s'audan tier ina dallas pli renomadas rimnadas d'art digl entir mund. Il suentermiezgi havein nus scolaras e scolaras saviu decider sezs tgei che nus lein far. Entgins han per exempel visitau la renomada fiera «Naschmarkt». Auters han gudiu in caffè en ina tipica casa da Café Viennese. La sera essan nus i da cuminonza, sin recumandaziun dil scolast d'art, ell'ustria «Zwölf Apostelkeller». Leu havein nus gudiu in delicius «Wiener Schnitzel». Suenter la tscheina essan nus i en ina bar per far in viva sin nossa davosa sera e sin quei bellezza viadi.

Il davos di essan nus puspei suttamess al liung viadi a casa. Quella gada ha il viadi pariu bia pli cuorts damai che nus eran tuts fetg staunchels ed havein saviu durmir empau.

Aschia ei in bi viadi ius da rendiu. Igl ei stau ina buna experientscha che vegn segiramein a star en buna regurdientscha a nus tuts. La scola media propedeutica ha gudiu il viadi cumpleinamein.

Gada Capaul, 3. classa FHMS



Selina, Petra, Anna e Chiara avon la casa dallas tschittas el Burggarten.



Gada avon il monument dad Erzherzog Karl. FOTOS MAD



Shania e Gianna avon il casti da Schönbrunn.



Valeria, India e Naomi avon in maletg dad Egon Schiele, museum Leopold.